



Prime Minister Modi-i linük 42 semdang
saka Manipur bo mesemdang: Kharge

Arsenal-i pound million 48.5
agi Madueke alizükogo



Forest Guard tatidang nung temulung machir: NSUI Nagaland

Dimapur, Chiteni/July 19 (TYO): Tawa Department of Forest, Environment and Climate Chang ajanga Forest Guard recruitment examination agiba nung kanga temulung masür, ta National Students' Union of India (NSUI), Nagaland ajanga sangdong ka nung ashi.

Iba tatidang agütsür temi temulung machiba lemsatepba nung ajemdaker yimjak nung metokmeperi lemsateper aser department dang tekeraba nung nüngdakba mera agitsü ajungshir, ta ashi.

Mezüngbuba nung iba tatidang agiba yimya ya khenyongi meshidak lir aser iba inyakyim ajunga nung temulung melemteter. Candidates nem OMR sheets magütsü, koba competitive examination ajak nung basic standard ka lir. Iba melen palrnok dang parnok telangzüba ya indang-indanga test booklet nung agütsütsü ashi aser iba sülen department-i meshi. Examination hall telungi 'correction pens' bener aitba osanga lir. Anungji item yimya ajanga ashi-külak aser tim masü mapa inyakba sayur, koba senzüka yutsüla masü, ta NSUI Nagaland ajanga ashi.

Yangji ano test booklet ya mapang tatsüka lir department indang employee ket nung aliba ngutet ta social media nung kanga prokshitar. Iba dak sendakba nung department-i telangzüba agütsüba ya tejangja masü aser temulung masür.

Ano 'mandatory walking

test' nung majangtet sernung written examination agütsüdaktsüba osang tejangja lir. Ajidang masü eligibility criteria nung aibelenba overage candidates tema exam agütsüdaktsüba osanga lir, ta NSUI Nagaland ajanga ashi.

Ano negative marking dak sendakba nung totuyuba balala agütsüba mechi exam centres balala nung mangmangtepba liasü. Centres kar nung candidate tem dang 'negative marking' malitsü ta metetdaksü saka kar nungbo alitsü ta metetdaksü, anungji candidate tem kanga mangmangdaksü aser aika nem tim masüba 'disadvantage' bener arutsü.

Maneni tesümangetsü aser mulungsentsü agi magizüktetba kaji, examination centres balala nung candidate jangjatsü asoshi documents timi reprangshiba jangjatepba meliasü.

Iba ama sübo-süyima inyakba yagi basic examination protocols nung aibelenba kisüing masü saka dangari tatidang agütsütsü kishi lapoktsür, aser recruitment process nung shidak meinyakba sayur, ta ashi.

Iba recruitment process ya tembangba sülen NSUI Nagaland ajanga item inyakyim kuli meshia RTI meshitsü. Maneni Department of Forest, Environment and Climate Change dang item ken o ochi nung bentetrateta candidate tem teimla mesamadaksütsü ayongzüker, ta NSUI Nagaland sangdong ajangasa ashi.

SMILE app tali kumdanga amshitsü DoSE ajanga metetdaksü

Dimapur, Chiteni/July 19 (TYO): Department of School Education, Kohima ajanga sangdong ka nung, Smart Attendance Management & Informative Leaves (SMILE), koba dang Teacher Attendance Monitoring System (TAMS) ta ajar, ibai NECTAR project kübok inyakba maparen mezünpur rongnung ka lir, koba World Bank teyari nung Department of School Education, Nagaland-i mapa kuma inyaker, ta ashi.

Iba nungya advanced facial authentication technology den employees tem pei school aser establishment premises nungi attendance agütsüdaktsütsü asoshi geo-fencing lir. State tesem ajunga nung attendance tracking shidak aser ochishia lidaktsütsü nükjidong nung iba system ya amshir.

Iba inyakyim tali tashi itshitsü atema Department-i NECTAR project ajanga Blocks, Sub-Divisions aser District Headquarters nung aliba government schools aser education establishments ajunga atema tablet devices agütsüogo. Item devices ya attendance agütsütsü asoshi kiosks amai lir. Ano iba App ya Android aser iOS smartphones ajunga nung amshiteter, ta sangdong ajanga ashi.

Iba dak alia SMILE app nungya offline attendance feature keta lir, anungji network junga maliba tesemtem nunga tamshir temi iba device nung

internet connectivity meliaka attendance agütsüteter. Iba app yagi offline data ya anogo 30 tashi yuteter, koba network anguba mapang pasasa synchronized asür. Iba den ano application nungya attendance regularisation feature keta lir, koba ajanga tamshir temi technical kuli mesüra official duties mechi attendance magütsüteti aliba anogotem asoshi attendance metongshiteter.

SMILE App ya February 1, 2025 nung live kuma School Education kübok mapa inyaker ajunga SMILE app ya amshia attendance agütsüdaktsü. Mezüngbo tamshir temi application performance majungba, internet connectivity nung kanga sashia metaloka aliba aser heaver server traffic mechi loading mapang talanglang agiba amala tebilemtsütem ajangshia liasü. Aser iba yongji tamshir temi attendance aiben agütsütsü merangaka takok anguba kanga ajema liasü.

February ita nungi SMILE app development team-i item timtem bentettsü meranga tanen makai meranga inyaka arutar. Tamshir temi ajangshiba technical issues timba bentetogo aser ita ishika tsüngta SMILE app temelenshi kanga lir.

Danga IT amshiba system nung ama mapang shia SMILE app nunga technical glitches alitsü akok, ajisüaka tezü metangi amshitsüla, ta Education department ajanga ashi.

February 1 nungi June 30 tashinung schools aser establishments 2,003 (data as of 1-7-2025) nungi schools 132 aser establishments pongu nung attendance shilem 80 dak tema liasü.

Ajisüaka school 27 nung attendance kata magütsü aser tesayur aser employees 1,525-i kasa mapang khen danga attendance agüja mali. Attendance shilem 50 kübok aliba schools aser establishments ya 1,071 lir. Ano employees aikati "suspicious" category-i aitba yimya amshia attendance agütsütsü merangba lir, ta ashi.

Item timtem ajak ajiteta Department-i attendance kanga junga meita repranger, anungji tesayur aser staff temi SMILE app kanga kumdanga amshitsü ayongzüker. Aibelenba employees aser schools nem tapet temerenshi agütsütsü. Iba dak sendakba nung heads of institutions tem dang tali saksalema iba app teti a m s h i d a k t s ü t s ü metetdaksüogo.

Internet connectivity maliba tesemtem nung SMILE app Coordinator temi anogo 30 nung khen kiosk tablet ya network aliba tesem bushia bener aotsüla. Timtem ajangshiba mapang tamshir temi helpline numbers 8974102488 / 6909644519 ajanga tongteprateptsü akok, ta Department of School Education ajangasa matetdaksü.

Osangbener dang tanur temenden wazüka ayutsü ayongzüker

Kohima, Chiteni/July 19 (TYO): Honibarnü Kohima nung tanur temeden wazüka ayuba indang media workshop ka agiba mapang media houses tem dang tenüing melena amshiba, noksa tepbangba ama child-sensitive yimya amshitsü aser otsü tem nung osang tejangja saka kumzüka ayutsü ayongzüka liasü.

"Understanding Child Rights and Child Protection: Role of the Media" onük nung ajemdaker iba sentong ya tanur dak sendakba osang abenba nung teinyaktsütem tali jangjashitsü aser metetjemtsü asoshi ayongzüka liasü.

Iba sentong ya Kohima Press Club (KPC) aser Nagaland State Commission for Protection of Child Rights

(NSCPCR) lungjemer Club küm 25 ajungba nüngtem nung ayongzüka liasü.

Phek indang District and Session Judge aser taoba mapang Supreme Court indang Registrar inyaka alisang Mezivolu T. Therieh ajanga osangbener dang tanur dena aliba osang abendang ozüing aser yimya shidak amshitsü ajungshia liasü.

Tila tanurtem maitsü kumzüka ayutsü tongtipang ta angatetdakja lai Juvenile Justice (Care and Protection of Children) Act, 2015 indang Section 74 den Protection of Children from Sexual Offences (POCSO) Act, IPC Section 228A, aser Cable Television Network Regulation Act nung shia aliba ozüingtem lemsatepba liasü.

"Tanur ya timtem ajurur alira süang, tai tongloksür mesüra tenük kuli alira süang, media ajanga parnok indang tenüing, addresses mesüra noksa em temai madoktsütsüla," ta lai ashi.

Lai media dang nübur jangra züngdaksütsüsa zülutsü memerangtsüla, kensü-osü aliba ken o amshiba mapang legal experts den shisa agiteptsüla aser tanur tiyong südaktsür shisa agüja aser parnok kumzüka ayutsüsa zülutsü ayongzüka liasü.

NCPCR Chairperson Alun Hangsing-i tanur temeden wazüka ayuba nung sectors balala lungjemer inyakba asr Indian Constitution nung fundamental rights ter shia aliba indang rateta ashi.

"Awareness timba agüjaka,

tanur anema mapa tamajung inyakba tali akumer. Anungji parnok aintsü asoshi protective environment agütsütsü asen arok teinyaktsü lir," ta pai ashi.

Director, Department of Information and Public Relations (DIPR), Dzuvinuo Theünuo-i arok khuret tem lemsatepba liasü.

"Tanurtem temeden wazüka ayutsüba ya agency ka kisüingi meinyaktet. Ibai media nungi tenzüker, kong nübur tangatetba yanglushitsütsü tashi tulu lir," ta lai ashi.

Lai osangbener tem dang osang shidak abenba den külemi pei sapang amshia nüburtem nem shisatsü agütsütsü ayongzüker.

Director, Department of Information Technology &

Communication, Sabou Yashü-ia Information Technology Act, 2000 nungi digital spaces nung tanur wazüka ayutsü indang ozüing tem agiteta jembia liasü.

Maneni KPC tir Alice Yhoshü-i jembidang, tanur dak sendakba ken o osang abendang tanurtem kumzüka ayutsüsa yimya shidak amshitsü nüngdaker, ta ashi.

"Headlines atema toktepba, terepranger mesüra tazünger timba kumdaktsütsü merangba nung takoksa ajuruaka tanur ka kumzüka ayutsüji tongtipangtiba lir," ta lai ashi.

Iba sentong nung KPC züngsem Seyiekietuo Keretsu menden liasü aser NSCPCR züngsem Akhumla Longchari-i melepzüing o jembia sentong tembang.

PIB-i media workshop ayongzüka agi



Dimapur, Chiteni/July 19 (TYO): Press Information Bureau (PIB), Kohima, Ministry of Information & Broadcasting-i ayongzüka anogo ka atema media workshop 'Vartalap' Hotel Saramati, Dimapur nung Honibarnü agiogo. Iba workshop ya '11 years of Prime Minister Narendra Modi government' ome nung ajemdaker agia liasü.

Workshop lapokba sentong nung o jembiba mapang Deputy Commissioner, Dimapur Dr. Tinojongshi Chang-i, iba amala sentong ajanga media maongka takarba kümdaktsüba dang masü saka yimti/jila balala aser

yimdak yimtsüngtem nung alirtem tsüngda apu latsürka ama asütsü, ta ashi.

Paisa, Ato Kilonser Modi kübok sorkari taoba küm 11 tsüngda project tem aika takok ngua benoka inyakogo, ta ashi. Media ajanga item sentongtem ya nüburtem tonga otetsü aser iba ajanga kija aser lokti dak kongshiba metetdaksütetsü, ta pai ashi.

Sentong nungsa Joint Director, Head of Office, PIB North East Zone Guwahati, Pavni Gupta-i PIB fact check aser iba dak sendaka aliba ken o tem indang metetdaksü.

Kasa mapang nung PRO,

Defence, Nagaland, Manipur & Arunachal Pradesh, Lt. Col. Amit Shukla-i ashiba agi, tang benoka aliba temelenshitem ya India defence modernization nung tongtibang alizüng ka asütsü, koba ajanga melenshia aoba lima ka nung asen sovereignty kümzüka ayutsü atema tarutsü asoshi renema aliba tashi tait tamendakdak ka yangertetsü.

Medical Officer, Rangapahar Military Station Medical Officer Captain Narendra Ningthoujam-i anir Army medical team kati health camp ka ayongzüka agi, aser iba ajanga osangbener aser ketdangsür 40 shi ajangzükogo.

Bhandari nung SDPDB senden amen

Wokha, Chiteni/July 19 (TYO): Ita shia amenba Bhandari SDPDB senden July 16 nü Summer House-cum-Guest House nung ayongzüka menogo.

MLA aser SDPDB Bhandari Chairman aser Committee on Environment and Climate Change Chairperson, Nagaland Legislative Assembly, Achumbemo Kikon leniba nung iba senden amendang pai Bhandari sub-division nung Veterinary, Horticulture aser Agriculture departments tsüngda Integrated Farming System atema benok.

Kikon-i, iba ya ajanga resource amshiba jenjang tajungba akümtsü, rongsenketzüng jenjang tajungba akümtsü aser küm piyong aluyimertemi mapa inyaktetsü, ta ashi.

Paisa, kiset shiruru metsüba ajanga shi supply agütsütetsüsa Bhandari sub-division nung maongka lir, ta metetdaksü.

Senden nung Veterinary Assistant Surgeon, Merapani, Dr Kikali-i, Assam nungi bener aruba an aser kiset shiruru ajak Nagaland telungi bener maitdang Dispensary-cum-Quarantine check post Merapani nung tama mita reprangtsüla/tendangtsüla, ta ashi.

Laisa, Veterinary dispensary

aser staff quarter dak sendakba nung tintem liaka department-i sub-division tesem ajaklen kiset shirurudem tashidak nungi jenbua alitsü atema awareness aser vaccination campaigns agia aruogo, ta metetdaksü.

Kasa senden nung SDO (Civil) Ralan & BM Uriamghat-i District Administration Sarupathar, Border Magistrate, Forest Officials aser Assam nungi police den CRPF-i Ralan Sub-Division nung Disturbed Area Belt (DAB) kübok Sector C nung kibok shia oa survey agiogo, ta metetdaksü.

Paisa, Sector C nung sorkari recognize asüba Naga yimtsüng pezü lir, ta ashi.

Kasa senden nung Nagaland State Seed Farm Merapani nung aluyimba aser tang teinyakdak Nagaland Foothill Road indanga jembia liasü.

Ano Additional Deputy Commissioner aser Vice Chairman SDPDB Bhandari, Longasen Lotha NCS leniba nung jurila senden ka mena taruba Independence Day anogomong sentong atema department balala nem mapa lemmütsü.

Kasa anogo nung MLA aser Chairman SDPDB Bhandari, Kikon-i Lio Longidang yimdak Community Hall ka semzütsü. Iba kiojen ya UDAP, DUDA 2024-2025 kübok asü.

Tuensang nung HSLC topper tem tushi

Dimapur, Chiteni/July 19 (TYO): July ita atema Tuensang District Planning & Development Board senden July 18 nü DC Conference Hall, Tuensang nung Minister for House and Mechanical Engineer aser Chairman DPDB Tuensang, P. Bashangmongba Chang lenisüba nung menogo.

Taoba senden minutes lepa reprangshiba sülen Board-i, Chang Khulei Setshang tir N.Y Choba-i Tuensang - Mon na sendaktepba BRO lenmang kanga mejungi aliba indang benokba onük sensak asem. Ken o mapang tatsüka sensak asema sülen board-i iba onük ya ken o dak sendaka aliba department dangi abentsü telemtetba agi. Board-isa, 51 Noksen A/C, 53 Tuensang Sadar

-I A/C, aser 54 Tuensang Sadar -II A/C atema LADP aser Iconic Scheme tem agizüka liasü.

Senden nung DPDB-i, Tuensang district nungi HSLC nung topper trok nem tetushi agüja laisü. Sentong nung o jembiba mapang Minister for Housing and Mechanical Engineer, P. Bashangmongba Chang-i, St. John Higher Secondary School, Holy Angel School, aser Eklavya Model School indang Principal aser tesayurtem nem kaketshirtem dang len sayuba aser parnok nongita yariba atema tenüngsang agütsü. Kaketshir aser tesayurtemi anibelem mesasai inyakba ajanga district nem konang tetushi bener arutsüogo, ta pai ashi.

Kaketshirtem ajungshiba

mapang Minister-i ashiba agi, "takok angurtem ajak otsü nung metoktsü maneni meranga inyakba densema lir. Nenok takok asoshi nenok sasa jenjang yangluang," ta pai ashi. Kaketshir kati tatidang aser tetsükdaktsü aika ajangshitsü saka temulungtetba tulu nung meranga inyakba ajanga tetsükdaktsü ajak koktettsü aser career nung temaba jenjang tongtettsü, ta pai ashi.

Kaketshirtem ya yi aser temesepba mozü achiba agi kanga kara atsür aoer ta shia, Minister-i ashiba agi iba ya kanga dang süoki ia agitsüba ken o ka lir. Paisa, kaketshirtem dang Tsüngrem tsündangi ajemalua aotsü aser tarutsü nung takok asoshi pa nem len anidaktsütsü asoshi asüngdangtsü ajungshia liasü.

General Administration Guest House semzüko

Dimapur, Chiteni/July 19 (TYO): July 18 nü Longleng nung Advisor Civil Administration Works Division (CAWD) and Taxes, Government of Nagaland, Kudecho Khamo-i General Administration Guest House semzüksüogo. Iba sentong nung MLA aser Chairman DPDB Longleng, A. Pongshi Phom tetushi tejaoker liasü. Sentong ya Longleng Town Baptist Church pastor Rev. H. Beau Phom-i sarasadem tenzüka liasü.

Sentong nung o jembiba mapang Kudecho Khamo-i, iba mapa mapang shitak nung tembanga inyakba atema Engineer aser administration nem tenüngsang agütsü. Paisa, terenlok maparen balala atema ali nüngdakba ajanga sorkar tetsükdaktsü adokba indang lemsatepa liasü. Pai ashiba agi, tamasabo terenlok atema ali kiburtem ali agüja liasü aser iba ajanga jila aser yimti, school, office aser lenmang yanglutetogo. Iba amala terenlok maparen ajak ya iba mapang

yimdaklirtem ali agütsüba ajanga koktetaogo, koba asenoki tanü angur. Ajisüka tangbo sorkar ali ken o nung tintemdar aser iba ajanga state nung terenlok maparen bangdaka lir, ta pai ashi.

Khomo-isa, state terenlok atema Chief Minister bendanga agütsür aliba indang metetdaksü. Mapa mongui aliba lanurtem nem mapa agütsütsü atema sorakari micro finance, start-ups/entrepreneurship atema bank loan agütsüba amala inyakyim balala benoka inyakdar, ta pai ashi. Khamo-i ashiba agi, taküm sorkari Skills and Entrepreneurship Development Mission' ta nüngja agütsür scheme tasen ka tenzüko aser iba ajanga lanurtem ajangzüksü ta ashi. Iba scheme ya business balala lapoktsü atema nüburtem ajungmsotsü aser entrepreneurship ajungkettsü atema lir ta pai ashi.

Kasa mapang nung MLA, A. Pongshi Phom-i o jembiba mapang, Guest House yanglutsü atema ali agütsüba asoshi ali kiburtem dang kanga pelaba

lemsatep aser ashiba agi, iba ajanga lokti ajangzükdaktsüogo.

Guest house ya nüburtem meyong ta shi pai sentepa aliba lokti dang iba ki pei meyong ama anepalua amshitsü ayongzüka liasü. Paisa, tarutsü nunga amshia otetsü atema Guest House anepalutsü ya ajak khuret lir ta ashi.



Ao Gazetted Officers' Federation lokti Telongjem ka tentetsü asoshi senden ka Kohima nung Kohima Ao Officers' Telongjem, Dimapur Zone Ao Officers' Telongjem aser Mokokchung Ao Officers' Telongjem telok nung lenirtem amenba sülen agiba noksa ka yangi angur. Iba maparen takok angutsü asoshi Ao senso ajaki sarasadem nung yaridaktsüner ta parnok temepishiba ka metetdaksüogo.

Don Bosco College Graduation Day mungogo

Kohima, Chiteni/July 19 (TYO): Don Bosco College Kohima nung Honibarnü 8buba Graduation Day mungogo. Iba anogo kaketshirtemi discipline balala nung takok tajung ngutetba atema degree tem agizüka liasü.

Sentong nung alakteta jaoker ama shilem agiba mapang Director, Center for Peace and Gender Studies & Co-Convenor Global Naga Forum Prof. Rosemary Dzüvichü-i ashiba agi, alima melenshia odor, tetoktepba aika lir aser iba den maongka-a aika lir, koba onok aikati mongui liasü.

Alima ya nenok temeyong talak nung lir ta shia lia kaketshirtem dang graduate asüba sülen pa/la asoshi kechi tajungtiba asütsü aji asadangtsü ajungshia liasü. Laisa, higher education nung scholarships aser fellowships agia maongkatem aliba indang lemsatepba den academic aser

pei taküm renloka aotsü atema bendangleni aotsü asoshi maongka alibatem bushitsü ayongzüka liasü.

Maneni lai graduate tem dang B.ed training agitsü mesüra aluyimba nung tetsüng ajemoka inyaktsü ajungshi.

Kezienuo-i (Controller of Examination, DBCK) result analysis metetdaksü aser graduate asürtem nem parnok takok tajung ngua pass rate 94 % ajangzükdetba atema tenüngsang agüja liasü. Graduate asür 303 nungi kaketshir 13 bo Nagaland University Toppers rongnung densema liasü. Kaketshirtem nem parnok takok tajung asoshi kuli kaketsir aser memento tem agüja liasü. Kasa mapang nung Benchumlo Kikon, (Dept. of History) nem 1buba Inkspire Annual Essay Competition All Nagaland, 2025 nung 1st Runner-up anguba atema tetushi agüja liasü.



July 19, 2025 nü Srinagar nung Congress züngsemtemi Jammu & Kashmir nem tanaben state jenjang agüjang, ta takhangba agüja longkak aيتدang tangokba noksa nung angur.

Prime Minister Modi-i linük 42 semdang saka Manipur bo mesemdang: Kharge

New Delhi, Chiteni/July 19 (Agencies): Honibarnü Karnataka kübok Mysuru nung lokti senden tuluka nung jembidang Congress Party Tir, Mallikarjun Kharge-i Ato kilonser Narendra Modi aser BJP sashia aitsüogo.

Ato kilonser Modi-i tang tashi Manipur mesemdangba atema aija Kharge-i, "Ato kilonser Modi-i linük 42 semdangogo, ajisüaka Manipur bo mesemdang," ta ashi.

"Kechiba nai Manipur mesemdang? Nai iba jagi aotsü tsübur asü? Rahul Gandhi-ibo anaben tashi semdangogo. Linük nung nüburtem süadokba mapang nung Modi bo bendanglen senzür," ta paisa metetdaksü.

2023 küm May ita nung Manipur nung Kuki aser Meitei nungertem tsüngda rara tulu adokba sülen tang tashi iba state nung tensa mesüngjemer.

Mallikarjun Kharge-isa, linük temzüng yanglushitsü atema nüburtemi BJP aser RSS nem temelaba magütsütsü, ta metetdaksü.

Mysuru nung sen crore 2,500 shi jenjang terenlok project balala semzükbä sentong nung jembidang Kharge-i, "BJP aser RSS-i linük temzüng yanglushitsü mesüra zülushitsü atema jembir. Nenoki (BJP/RSS) iba atemaji koba tashi merangaka iba linük nung nüburtemi linük temzüng melentsü atema memelatsü. Nenoki (nüburtem) linük

temzüng yanglushitsü atema parnok nem temelaba agütsüra nenok temeden makai akümtsü," ta ashi.

"Modi, linük temzüng ajanga dang na Chief Minister (Gujarat) aser Ato kilonser aküm, Parliament telungi maidang nai linük temzüng matsüngdang apudak, ajisüaka tanübo Modi-i kasa linük temzüngji tepseter," ta Kharge-i ashi.

Congress aser BJP na medemdanga Kharge-i, "Congress party nung alirtemi mapa inyaker saka Modi'er BJP nung alirtemi o dang jembir," ta ashi.

Iba sentong nungji Karnataka Chief Minister Siddaramiah, Deputy Chief Minister D K Shivakumar aser minister tem aika liasü.

Alipore Zoo nung aonung ka kija nung arem shiruru 300 sama

New Delhi, Chiteni/July 19 (Agencies): Kolkata nung aliba Alipore Zoological Garden ya India nung zoo tejentibatem rongnung ka lir, ajisüaka ketdangsertemi iba zoo junga anepalu masür, ta tai tonglokja ken o ka benokogo.

Kolkata nung aliba melungtet telok- NGO Swazon-i July ita tetenzüklen temepishiba ken o ka Calcutta High Court nung benokogo. Ketdangsertemi iba zoo junga anepalu masür, ta melungtet telok jagi high court nem metetdaksü.

Küm shia Central Zoo Authority (CZA)-i renema sangdongba 'Annual Inventory of Animals in Zoos' report nung ajemdaker NGO Swazon-i, 2023-24 kümsük tatembangbuba anogo aser 2024-25 kümsük mezüngbuba anogo tsüngda Alipore zoo nung shiruru 321 samaogo, aser iba tetezü aonung ka kija nung shiruru 300 dak tali samaba lir, ta metetdaksü.

Osangbener den jembidang NGO Swazon nung züngsem, Swarnali Chatterjee-i, "Iba ya osang mimshiba lir, aser tesüiba küm aika tsüngda metokmeperi

jenti lir. Shiruruji atangji samar asü, mesüra osang shidak magütsür. Iba ya tebilemtsü onük ka lir," ta ashi.

Financial year 2023-24 tatembangbuba anogo (March 31, 2024) nung iba zoo nungji shiruru ajak senteper 672 liasü, ajisüaka 2024-25 kümsük tetenzük anogo (April 1, 2024) nungbo iba zoo nungji shiruru ajak senteper 351 liasü ta report agütsü. Iba tetezü aonung ka yongi iba zoo nungji shiruru 321 sama.

Tesüiba mapangtem nunga kümsük tatembangbuba anogo aser kümsük tetenzük anogo nung Alipore zoo nung shiruru report memedembaji aiben ataloka lir.

1996 küm mezüng March 31 nü Alipore zoo nungji shiruru 1,805 lir ta metetdaksü, ajisüaka April 1 nübo shiruru 1,872 lir ta report agüja liasü. Yamaji 1996 küm nungi tenzüka 2025 küm tashi nung Alipore zoo nung aliba shiruru report memedembaji aiben ataloker.

World Animal Protection India nung Wildlife Research Manager, Shubhobroto Ghosh-i, "Khenyongi arem shiruru aika samaba osangji taoksatsüka lir.

Shibai metet, tesüiba küm aika tsüngda Alipore zoo nung shiruru noklang aika samabaji ozüng alema arem shiruru shishilembaba agi asütsüa akok," ta metetdaksü.

Osangbener den jembidang Alipore zoo nung director Arun Mukherjee-ibo, "Iba ya shiruru züngdangba maparen nung aibelenba dang lir. Onoki ibaji metongshitsü meranger," ta ashi.

Ajisüaka Ghosh-i, züngdangba maparen nung aibelenbaji khen-anabenbo asütsü akok, saka küm 30 tashi aibelenbajibo aibelenba inyakba masü, ta ashi.

Tang tesüsa March 31, 2025 nü sangdongba report sasep nung, tang Alipore zoo nung ozü-sangno aser per densema arem shiruru ajak senteper 1,184 lir.

NGO Swazon-i benokba temepishiba ken oji July 24 nü Calcutta High Court nung bench kati angadangtsü. Parnoki court dang tesüiba küm 10 indang report tejangja agütsütsü aser züngya nung metokmeperi alibaji rasaa ashitsü atema zoo ketdangsertem nem tetuyuba agüjang, ta mepishir.

Patna hospital nung nisung khaseter pongu Kolkata nung puogo

Kolkata, July 19 (Agencies):

Brihostibar anepdang Bihar yimtiba, Patna nung aliba nija hospital ka nung Chandan Mishra khasetba dak sendakba ken o nung Honibarnü Bihar Police-i Kolkata anasa New Town nung nisung pongu puogo.

Police-i ashiba agi, nisung ponguji New Town kübok satellite township nung aliba ki ka nung atsüka liasü. Honibarnep Bihar Police aser West Bengal Police na senteper mita aoba mapang nung ozüng alema inyaker telok nungi nisung ponguji apu.

"Nisung pongu nungjagi pezüibo nisung tepsetba nungji shilem agia lir aser tanüngba nisung kaji jagi iba nungji shilem agia lir asü maliar mejangja. Patna nung nisung khasetba sülen parnok Kolkata-i jena ao," ta police ketdangser kati metetdaksü.

"Parnok indang mobile phone tower location ajanga onoki parnok bushiteta liasü. Bihar police-i parnok local court matsüngdangi anir aoba sülen parnok Bihar-i anir aotsü atema temelaba meshitsü," ta paisa

metetdaksü.

Chandan Mishra ya nisung tepsetba ken o nung aija tepuokdak liasü, ajisüaka pa temang majungba agi pa bail nung chioka hospital kati oa treatment agiba mapang nung nisung pongu hospital telung jagi aiba sülen pa khaset.

Nisung ponguji ICU telungi aiba sülen ana nungi Mishra dak injang khaloktsüba CCTV noksaji social media nung kanga prokshiogo.

Mishra ya Bihar nung Buxar district nungi lir. Nisung tepsetba ken o 12 densema ozüng alema inyakba ken o 24 nung pa aija Beur Jail nung puoka liasü.

Hokolbarnü osangbenertem den jembidang SP Patna (Central) Diksha-i iba hospital nungji security tashi maitba metetdaksü.

"Iba tatalokba ajanga hospital nung security mejungi aliba jangjar. Nisung pongu hospital tamentep tanabuba jagi atuba sülen Mishra dak injang khaloktsür agen. Bushisüngdangertemi security tsütsü metokmeperi-a bushisüngdangdar," ta laisa metetdaksü.



July 19, 2025 nü Hyderabad nung Justice Aparesh Kumar Singh-i Telangana High Court Chief Justice tenangzükbä agiba sülen Telangana Chief Minister, A. Revanth Reddy-i pa pelaa agizükdang tangokba noksa nung angur.

BJP-i Aug. 15 tashi nung party Tir shimtsü

New Delhi, July 19 (Agencies): Independence Day anogomong mapang anasa Bharatiya Janata Party (BJP)-i Tir tasenba shimtsüa akok, ta osang ka ajanga metetdaksü.

Tang party telung nung BJP National Tir tasen shimtsü atema o lemtepdar, ajisüaka tang tashi nungbo BJP aser Rashtriya Swayamsevak Sangh (RSS) napronglai official sangdong kecha magütsü.

Tang BJP Tir teinyakdak aser Union Minister, JP Nadda ya 2020 küm January ita nungi Tir inyaker. 2024 küm Lok Sabha election tashi pa kümsük atsülangja liasü, iba sülen party Tir tasen shimtsü ta bilem, saka tang tashi meshim.

Osang angazükba agi, BJP-i Tir menden atema Union Minister aser Odisha nungi party lenir tain, Dharmendra Pradhan shimtsüa

akok. Tang mezüng Odisha nung BJP sorkar tenteta liasü. Pradhan-i joko mapang talangka party telung onüktem nung shilem agia arudar aser region nunga pa ya tongti lenir ka lir.

Ano külen BJP-i Tir menden atema Rajasthan nungi Union Minister Bhupender Yadav shimtsüa akok. Tang pa ya Environment, Forest & Climate Change Minister teinyakdak. Pai joko mapang talangka Amit Shah densema central lenirtem den inyaksema arudar.

BJP-i Tir menden atema taoba mapang Madhya Pradesh Chief Minister aser tang Union Agriculture Minister teinyakdak Shivraj Singh Chouhan shimtsüa akok taka jembir.

2029 küm Lok Sabha election agitsü lia aser state aika nung assembly elections agitsü lia BJP Tir tasen shimtsü.



TIR YIMYIM YIMOBILEM (EDITORIAL)

DIMAPUR

AMUNGNÜ

CHITENI 20, 2025

Tsüngrem dak mulung alemba

Yerimia mapang nung Israel nungertemi parnok Egypt lima alar tia nungi anitetba Yihova Tsüngrem temeim aser tashi tulu to amadoker, parnoki parnok sepaitem aser parnok chubatem tangar kintem den putepa aliba tesendaktep nungi teyari anguba ajanga Babylon nungertem akoktsü ta bilem. Atangji, parnoki parnok tebang temeli agibo Kibuba Tsüngrem dak amanger ama jembisa saka parnok temulungjangbo Pa dang nungi talangka pilaadoker liasü. Parnoki Kibuba dak dang jenoker ta parnok bang agibo sarasadem saka parnok mulungjang nungbo parnok rongsen aser tashitait sepaitem dak dang temulunglemteta liasü. Ibayongji, parnoki tebang agi Kibuba Tsüngrem sanga jembiaaka, parnoki inyakba mapatembo ajak Kibubai memulungbatem liasü. Iba ama mapang ka nung, Tsüngremi Yerimia ainker ajanga Israel nungertem dang, " Tasütsü tashidak tulu agi parnok asütsü. Parnok mang mayimtsü mesüra parnok maremtsü, parnok tasü mangji ali tema nung jana ama alitsü. Nok agi aser yawara agi parnok samatsü aser tasü mangji anüng ozü aser arem shirurutem asoshi chiyongtsü alitsü," ta metetdaksüba Yerimia tapu 16 nung shia angur. Ano, iba sülena Tsüngremi Yerimia dangsa, " Shibai nisung dak amanger aser pei temang shi tashi aitba dak temulung alemer, shiba mulung Kibuba nungi pilar, pa atakatem asütsü," ta Yerimia 17 nung shia aliba asenoki angur. Asenok asoshi mapa ajak nung temulung lemtetba ya kanga tongtibang lir. Temulung lemtetbaji temoatsü aruba lenmang aser tasü aittsü tashi angudak tesem ka lir. Aji oda, asenoki Tsüngrem dak dang temulung alemtsü melena asen akaba aser aseni metetba dak temlung lemra, item ajakji asenoki tanga tsüngrem dak temulung alemba aser süngyanglu külemba mapatem asütsü. Aji oda, asenoki kodaser Tsüngrem dak temulung alemer ta metettsü ? Yerimia mapang Israel nung amaji pei metetba, akaba aser tashi nung tangar dang tajungba, takaba, temetetba aser tashi tuluba amato küma alidang, asenoki tebang agi Tsüngrem tashi indang jembiba ama asen mulung aser mapa agia Pa dak temulunglemteta ajemalua liteter asü ? Asenok tetsübu aser timtem nung alidang shiba dak jenoker ? Asenok jashidang aser shirang dang shiba dang ashir ? Asenoki tebang agibo Tsüngremi dang akoktsü aser Pa dak dang temulung lemtetter ta jembir saka asenok timtem aser shisabolu mapang nungbo asenoki tangar dakang temulung telemtetba akümer asü ? Atangji, asenok timtem aser shisabolu mapang nisung kar nungi dang teyari angutsü, kechiyong asenoki ngua Tsüngrem asenok dangi marutsü. Aji oda, aiben, Tsüngremji asen dangi tangar nisung ka kümer arutsü. Itemji asenoki meteta aliba medemer, kinunger, kiyonger mesüra yimtsü yimer asütsüa akok mesüra asenoki kodanga majurudang aser memetetba nisung ka nungiang teyari arutsüa akok. Item teyaritemji ajanga asenok temoatsü aser takok angudang, asenoki shitakba maotsüsang Tsüngrembo amadoktsüa akok. Asenok atema tekümdangtsüji aji lir. Asenok meshimetsü jenjang nung alidangbo asenoki Tsüngrem dak dang metaloker, Pa dang dang asüngdanga kechisarina inyak. Ajisüaka, kodang asenok taküm aser kibong tera anisüngzükleni aru, asenoki Tsüngrem dak masü nisungtem dak dang amangtsü tenzüker. Teyari aser temoatsüji Tsüngremi agütsür masü saka nisungtem jagi agütsür amai bilemer. Ajisüaka, nisungtemjibo tenyatenponger ka dang lir saka tagütsüsang aser teyoksangjibo Tsüngrem lir. Israel nungertemia parnok anitetba aser moatsüba Tsüngrem dak temulung alemtsü melen parnok chuba aser sepaitem dak dang temulung alem. Iba jagi Babylon nungertem Yirusalem tonga makyonga aruba mapang tashi nunga Israel nungertemi Tsüngrem dang nungi teyari aser teküzmükba memeshi, kechiyong parnoki parnokji kanga tashi itta lir ama bilem. Aji oda, parnoki Tsüngrem nungi teyari bushitsü bilemdangbo menuadoker liasü. Tanüa asenok aikati pei akaba aser metetba nung temulung lema alitsüa akok, saka Laishibai ashir, " nisung chir dak temulung telem, kechiaser pa tanüa oadoktsü aser ali akümtsü aser iba anogo nungjisa pa sentong ajak mali akümtsü," T.Ken 146:3-4. Anungji, " Nisung dak temulung alemba dang nungibo Kibuba dak temulung alem tajungba," T.Ken 118:8.

OLEMSABANG

Sarasadem tesep koma asünung tajungba süla

Limatula Longkumer

(Yashi adok nungi...)

- o Ano sarasadem tesep ki nungji kibur dang masü, saka counsellor-temji teimba ka theology mazüng, general education-a junga manguba rogo aika lir. Saka tanela sempet aka nungji (Qualification) parnok yamala centre nungji tenzüker. Takar, tulur, sensaker, tilar ajaki parnok tsüngdangi aor, aser sarasademdaksür, Bible study aser counselling agütsür. Iba nungji Lai ratet aser tesayuba agütsüba nungji timtem aiben adoktsü akok, kechiba süra Lai ratetba nungji tanela lenis?ba denji Laishiba tapak angateta azüngtsübaji tongtibang lir.
- o Ashiko sarasadem tesep ya kar asoshi employment angudak ka asütsü akok. Amanger, ajaki Tsüngrem tanela tetuyuba nung centre lapoker ta kuli tejangja agütsütsü südi, saka jungjunga shisadangra iba ya industry ka, self employment amai mekümdangra asen lima nung lapoka aotsü. Theological college lapokbaji fashion ka ama khen mapang ka nung lapokogo aser tang prayer centre lapoka aor.



Prayer Centre aser Arogo

Arogo aser prayer centre tesentaktep kechi lir? Sarasadem tesep yagi arogo inyakyim nung jangjonger asü? Arogo aser Sarasadem Teseptesentaktep nung timtem kar adoka ali asü? Mesüra arogo dang nungi parnoki ministry tajungba bener aor asü? Arogo asoshi sarasadem tesep ya teyarir tajung ka amai, arogo teinyaktsü aika parnoki inyakatoker asünungji arogo mapa pongpa kümdaktsür asü? Amanger tang tashi nungbo kecha telemsatep, tejashitep aser tashishitep malitsü südi. Saka kechiba külem arogo züngsemi arogo toktsür yamai fellowship tenzüka aor ta aiben bilemer. Arogotemi tenzüka wadang khen süoki ia bilemdangtsü mapang tonga aitogo. Ao lima nung arogotem kanga dang institutionalized süatoker, secular office ama dang küma odaki. Arogo ya kechi atema alir? Tsüngrem tenzüka tetezü khen lepa reprangshitsü mapang tongogo. Nüburtem asoshi tanela chiyungtsu prayer centre nungjiang angur asü?

Sarasadem Tesept Den Sentakba Nung Temelenshitsü Kar

Yangi sarasadem tesept nung temelenshitsü ta asü dang, iba nung ya sarasadem tesept aser arogo anaprongla nung inyakyim melenshitsü nüngdaker ta ajiteter. Anungji yangi yamai asünung jungdisü ta kü tebilemba kar lemsateper.

Prayer Centre Arogo kübok aita achayangtsüla: Prayer Centre ya local arogo kübok yutet nungbo tajungtiba asütsü amai bilemer. Iba ya arogo nung ministry tongtibang ka küma nüburtem tanela nung tsüratemdaktsü nungbo tajungtiba asütsü. Shitakba agi prayer centre-i inyakya aliba ya arogoi inyaktsüba mapa lir ta angatetdi. Mesüra Mungdang küboki anioka, guidance teperi agüja anepalu nunga ajungtsü asü ta bilemer. Arogo aika nung prayer mountain, prayer room, ta nüburtem sarasademtsü lapoka yuja lir. Yamalaji mesüka arogoi sarasademtsü tesem lapoktsütsüla. Iba jagi jentipur ajangzüktettsü aser tanela ain akettertema pei sempet amshitsü leman sadema angur.

Yamai pei pei jurila fellowship tenzüka modaktsüi, arogoi tanela sempet akartem, aser sarasadem nung tejangrartem ya telong junga anitener amshitsüla. Parnok nem guidance peria agütsütsüla. Ashiko sarasadem tesept lapoka aoba ya arogo nung sadema shilem magitetba ajanga asütsü akok. Pastoral ministry nung asentenshi nüngdaker: Prayer centre tenzüka aoba ya arogo nung pastoral ministry nung tashi mait akümba tamaitsü ka asütsü akok. Arogo ya nüburtem asoshi alir ta metetdi. Nüburtem tanela aser shi nung ajungmesotsü, ajungshitsü, metongshitsütsü, anepalutsü aser achayangtsü, aser Tsüngrem o nung tera yanga anitettsü asoshi alir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Ao Baptist Arogo Shillong Men's Fellowship agiogo



4buba Ao Baptist Arogo Shillong Men's Fellowship nung shilem agirtem tangokba noksa nung angur.

Shillong, Chiteni/July 19 (TYO): 4buba ABAS Men's Fellowship July 12, 2025 anogo nung ayongzüka Shillong anasa U Dwet Sing Rymbai Green Resort, Lait Diengwah, Smit nung kaogo.

Iba sentong ya "Brotherhood in Christ - Faith, Fellowship and Fun" omen nung ajemdaker agi, ta Arogo tezülur, Temjenmangyang-i sangdong ka nung metetdaksü.

Iba sentong nung Imo Pongen leniba nung tekülem agi. Pai Yohan 21:15-17 nungi Yisui Simon Peter dang "Yona chir Simon nai Ni meimer asü? ta asemben tashi asüngdangba nungi lesson agiteta, Yisui Kü sülen tashi anga anidakang ta ashiba nungi shisadangdakja lemsatep.

Paisa, iba Men's Fellowship nung tebur/teburtem paikati dena shilem tajung agiba ya tashi ulura, anungji iba lokti-i Khrista nung longjemmer ano kechisa inyaktettsü/inyaktsüla? ta asüngdanga ajungmeso.

Tanü asenok rongnunga sunga teyari nüngdakba lemsatep aser iba resources

ya ajanga tajung inyaktsü asoshi asen litsü ulushia mangdang ulushitsü ajungshi. Devotion temer külen züngsem shiai pei medemer kaka bushir 'prayer exchange' sarasadem mapang iba moapu nung kaa liasü. Iba sarasadem temer telokji group 4 küma lemsar football asaya.

Iba saisapong nung ajaki shilem tajung agia group anati first aser second jenjang angu aser third place asoshi group ana penalty shot out agia telok kati takok angu.

Iba anogo football asayaba temer nisung shia pei pei jangraba tesemi oa kar swimming pool nung tzü-awa, kar meta penzüa yimyai moatsüba moapu, süngdonglidong, ozü-sangnu penzüa mapang tatsüka indoka liasü. Iba sülen telok chiyungba mapang agir tatemsa telongjem mapang ka agia liasü aser iba mapang nung sentong nung adener rongnung tambusang Sentimoa Lemtur aser C Maong Longkumer nati tajungshi o tajung lemsatep.

Iba Men's Fellowship nung

adenertem kanga tia ka-a Rev. Dr. Mar Atsongchanger densem nung pai lokti ayongzüka lemsatep. Tesayuri Yisu Khrista nütüsing 12 tenüng asüngdanga tenzüük aser Laishiba tatalokba otsü nung Yisu nütüsing rongnungi nütüsing 'blunder' 3 liasü aser parnokji Yihuda Iscariot, Yihuda aser Yohan liasü, ta ashi. Asenoki Yihuda Iscariot otsü meteta lir aser adianu anaji shir pei tetsüü kodang mapang tonga arudang Yisu Khrista tachichi aser tabelen amentsü Khrista dang mepishiba tatalokbaji liasü!

Iba tatalokba nungi tasüngdangba tajung bener arua tanü asenoka kong lir? ta asüngdanga asenoka Khrista nütüsing kaka süra 'nia kong lir?' ta shisadangdi ta pai ayongzük.

Aji oda, nisung shiai pei molungjang nung tasüngdangba bener iba session nung temoatsü tulu ngua denogo.

Iba Men's Fellowship nung Sannuker Rev. Dr. Meyu Changkiri-i anir shilem agir ajak agi tebur 39 liasü.

ANOGO ABEN TSÜNGREM DEN

Halleluyah

Nenoki Kibuba sangang (T. ken 146:1)

Halleluya Oji "Nenok Kibuba sangang" ta meyip. Iba O ya Tenüsang Ken nung metsür pezüben amshiba angutsü aser Jungkai Adokba tapu ter tuku nung pezüben angutsü, meyokteper metsür tiben amshiba angutsü. Tenüsang Ken nungji alima Halleluyah aser Jungkai Adokba nung amshibaji kotak Halleluyah lir. Ibai tanga o ajanga tanga oshi nung meyipzüksü makok. Ibai Greek, Latin, German, French, Italian, Dutch aser English ajak nung kasa amshir. Kin ajaki kotaker ken nung Halleluyah amshir.

Yimya Halleluyah : Tenüsang Ken 104ji iba o yagi atenba angutsü. Iba ken yimya tebur ajungba sangro ka lir. Ibai temoatsüba Tsüngrem dangi tanela ajaba agi tenzüük aser Tsüngrem uluba, Pa tamaren indang yimya bushiba nung yimsü mulungjang atenba shisatsü nung jembir. Tesangwaji Tsüngrem sobutsü. Pai süki ama anüngtem atsülanga toktsür aser tzüym kimongji Pai yanglu. Mepettemi Pa talungtsü aser mopung tashikang nung amener. Tsüngmokji pa ola. Pai ayongnutemji yanglu koba agi ozü aser arem shiruru nem tzü agütsür. Remji nashi telok asoshi, süngdongtemji ozütem tesepe yanglutsü asoshi, tenemtemji arem napongtem asoshi, lungtemji shisen jenokdak asoshi Pai yanglu. Item yagi Pa temeim aser shisatsü indang sayur. Pai ita aser anü asoshi ozünyanglu. Anü adoker aser anü tesangwa nisungtem pei mapai aor aser nikongtsütsü tashi mapa inyaker. Ammangi anisüngzüük agütsür.

Idangji ken züluri tzüym dangi meyip kong oset jenti lir aser tzüma nung rongtem senzür aser telung nung shiruru tulu asayar. Tsüngremi itemji taküm lidaktsür. Yimya bushiba jagi ken zülur mulung Tsüngrem tenüng asangba agi sünga kümdaktsü. Pai ashi, "Pa asoshi kü teshisadangba tanang asütsü. Ni Kibuba nung pelatsü." Kaket anaji memesüktepi mali. Tsüngremi aji asenok asoshi zülü, yimya kakat aser Jungkai Adokba kakat. Anaprongla nung Tsüngremi Pa sasa jungkai adok.

Yimyaren alir shirnoki Tsüngrem mapa nung Pa mangur parnok parnok sasa tenük poker alir aser angutsü nungtemer. Tsüngrem dak mamangertem parnok sasa nükpok shimertem lir. Alima nung, tzüym nung aser anüng nung kechisarena agi Tsüngrem jungkai adoktsür.

ABAM aser Mokokchung Aor Officers' Telungjem mensem amen



Mokokchung, Chiteni 19 (TYO): ABAM Ministerial Secretary tem aser Mokokchung Ao Officers' Telungjem (MAOT) mensem tajung ka Chiteni 17, 2025 anogo nung Fazl Ali College conference Hall nung agia liasü. Rev. Temsü Jamir

Executive Secretary, ABAM ajanga Mokokchung Ao Officers' Telungjem ajanga nüburtem asoshi aria bilema Coaching center lapokba aser Arogotem nung tenzükertem asoshi Skill Development training agütsüba ajak asoshi pelaba lemsatepa liasü. MAOT

dang pai, "Nenok tanü kechi nung mena lir, iba mendenji Tsüngrem nungi aruba lir. Anungji nüburtemi nenoki yutsüba tsügnep tajung ngua parnok yabo khenyongi balaka liasü ta menungraba O jembitsüsa bendanga agüja tenzüükang," ta ayongzüük.

Tarutsü nükla indang jembidang paisa ashiba agi, ABAM resource Center Kangtsüng ya ano maneni tajungba küma yanglushia ecotourism center ka yanglua nübur asoshi tangazükba tesem ka asütsü aser Impur tesem ya tanelar luyim nung arangtetba

longzüük ama yanglua nüburtem temoatsü agiba tesem yangtersü asoshi teyongyaba o ashi.

Sensaksem agiba mapang tajung agia Executive Secretary tarutsü nükla ayuba indang asoshi takoktsü lenmangtem asameyanga jembiba den külemi tanü asen lima nung communitization dak sendakba nung Arogo aser ABAM-i yaritepa inyakra mapa aika nung takok angutsü indang kanga tongtibang, ta sensaksema liasü.

Hospital koba Impur nung lir iba ya maneni lokti ajak teyaritep nung temaba jenjang ka nung yanglua amshiba ajanga nüburtem aisü nung teyari angutsü ta jembia liasü.

Lokti ajak kanga tongtibang lir aser ajak lungjemba nung takok angutsü alinung, maneni asen Aor lokti ajaki teka amtepa mapa ajak nung arok ta angateta inyaktsü tamang ayur.

AO OSHI ANGAZÜKDAK:
TANÜ ANGAZÜKTSÜBA OJANG



Teremra

(adj) moamoji, temoatsü anguba (good fortune)
* Onok ayongi aoba teremra asüba agi ango aika apu.

Terenem

(adv) mapa tembangba (finished, prepared)
* Senden temer kiburi chiyongtsü terenem yuja liasü.

OLONG PAITEP # 7214

1						2				3
								4		
5		6				7				
8										9
								10		
				11		12				
		13								
14						15				
			16							

TIPIEN		LANGTSÜNGLEN
1. O jembitsü tashi	- 8	1. Tepok telung nung shilem ka - 7
5. Süngjang tapu ka	- 5	2. Tamajung aküm - 5
7. Tekanük nung enokba	- 5	3. Chi den külemi achiba - 3
8. Teka amtep	- 5	4. Meimchir alimai aruba - 3
12. Tzüc asendak	- 5	6. Laishiba nung ayong ka - 4
14. Tsünpang tema aliba	- 5	9. Tarutsü nükla - 7
15. Ken atenba yimya	- 5	10. Tamendakdak/Nükjidong - 4
16. Asangur	- 8	11. Tenük-telen mejungi aküm - 5
		13. Terok nungi adokba - 3
		14. Meimchir telemsa - 3

OLONG PAITEP # 7213 TELANGZÜBA

TIPIEN :	LANGTSÜNGLEN :
1. Asaya, 6. Shirang, 7. Noa, 9. Yim, 11. Telemsa, 12. Ita, 15. Aja, 16. Asentzü, 17. Tapok.	2. Ayir, 3. Angi, 4. Süngya, 5. Takar, 6. Senti, 8. Jen, 10. Maksü, 11. Talang, 13. Tasa, 14. Atep, 15. Amo

NAI-A YA METETTER MA



Alima nung awatsng tulutiba 10

Awatsüng	Linük
1. Caspian Sea	Kazakhstan, Russia, Turkmenistan, Azerbaijan, Iran
2. Superior	Canada, United States
3. Victoria	Uganda, Kenya, Tanzania
4. Huron	Canada, United States
5. Michigan	United States
6. Tanganyika	Burundi, Tanzania, Zambia
	Democratic Republic of the Congo
7. Baikal	Russia
8. Great Bear Lake	Canada
9. Malawi	Malawi, Mozambique, Tanzania
10. Great Slave Lake	Canada

NH-6/306 majungba ajanga Mizoram oil tanker tem inyaksangshi anener

Aizawl, Chiteni/July 19 (Agencies):

National Highway-6/306 kanga majungba anema longkaka aita Mizoram nung Oil tanker temi Honibarnü nungi inyaksangshi anenogo. Iba lenmang ya state aser Assam na sendaktepba lenmang tongtibang ka lir.

Mizoram Oil Tanker Drivers' Association (MOTDA)-i Hokolbarnü sangdong ka ajanga ashiba agi, Sairang aser Kawnpui na tsüngda highway ya kanga mejungi raksar aliba ajanga oil tanker tem senzusenpongtsü lendong kümogo.

"Lenmang yanglushija

senzusenpongtsü atema lendong makai maküm tashi July 19 nü nungi iba national highway nung mesenzütsü atema MOTDA-i telemtetba agiogo," ta kasa sangdong ajanga metetdaksü.

NH-306 ya Mizoram yimtiba Aizawl aser Assam nung Silchar na sendaktepba lenmang tongtibangtiba lir. Iba lenmang ya khu, totzü aser tanga tenüngdakba osettem abentsü asoshi kanga tongtibang lir.

Sairang aser Kawnpui na tsüngda lenmang ya tzünglu aruba ajanga kanga mejungi raksaogo. National Highways and Infrastructure

Development Corporation Limited (NHIDCL)-i tawa state sorkar ket nungi iba lenmang anepalutsü atema khuret agizükogo.

NHIDCL Executive Director (Project), Virender Kumar Jakhar-i ashiba agi, lenmang ya July 10 nü nungi yanglushi tenzükogo, saka tzünglu maneni aruba aser gari tali nongtepba ajanga minpronga arudar.

Kasa mapang nung Mizoram Truck Drivers Association (MTDA)-i NH-6/306 yanglushitsütsü khanga Gauhati High Court, Aizawl bench nung Public Interest Litigation (PIL) ka benokogo.

Assam: Paikan reserve forest azüngtetba mapang police amaker 10 apu

Guwahati, Chiteni/July 19 (Agencies): Brehostibar anepdang Assam nung Goalpara district kübok Paikan reserve forest nung ozüng alema ali

atsünger alitem mintokba mapang police aser forest department personnel tem amaktermarnok 10 puogo.

Police-i ashiba agi, iba tesem nung mepetmesü adokba mapang civilian pezü aser security personnel 21 yirua liasü. Arishi küm 19 tain asangur chanu ka injang agi yirua asü aser nisung asem tang injang agi yirur temang anepaludar.

"Onoki tang tashi nung duty personnel amaker nisung 10 puogo," ta police ketdangsür kati ashi. Tensa mejungi aliba tesemtem nung

Security akangshiogo aser nüburtem aotsü memelar," ta ketdangsür yagisa shisem.

Mekazüka aliba arem ali bigha 1,038 azüngtettsü atema July 12 nü iba sentong ya benoka inyaka liasü. Ketdangsürtemi ashiba agi, iba sentong benoka minyak tsüngda iba tesem nung kibong 1,080 lia liasü. Sepaitemi iba tesemi oli aruli asüba lenmang ka tudanga ayuba sülen tensa mejungi aküm aser nüburtem kari iba anema nokdaka liasü.

Assam Chief Minister Himanta Biswa Sarma-i ashiba agi, Congress party nungi züngsem kari mepetmesü adokdaksütsü atema rongshia liasü. Paisa, police aser forest personnel

tem ya jelia sentong yanglur amak aser parnok ya long, süng aser tanga hadir techira agi maka liasü.

Chief Minister-isa, sepaitemi tanga lenmang kecha maliba agi prangbong amshitsüsa aküm ta shia parnok pusemogo. Paisa, Uriamghat, Golaghat district nung tesem balala densema ozüng alema ali atsünger alibatem maneni azüngtetyonga aotsü sorkar bendanga agütsür lir, ta ashi.

Kasa mapang nung BJP state otongdar Kishor Upadhyay-i, sorkari ali azüngtettsü atema jenjang agiba anemba atema opposition lenir Akhil Gogoi (Raijor Dal) aser Lurinjoyoti Gogoi (Assam Jatiya Parishad) na aitsüogo.

Manipur nung gari auyar asem apu



Imphal, Chiteni/July 19

(Agencies): Thoubal district kübok taoba ghonda 36 tsüngda meita aoba sentong balala benoka inyakba mapang Manipur Police-i gari auyaba dak sendaka aliba nisung asem puogo.

Bushisüngdanga aoba mapang auyar or aliba motorcycle ana nguteta liasü, ta ketdangsürtemi metetdaksü.

Police sangdong ka ajanga Honibarnü ashiba agi, osang tejangja ka angazükba sülen

Lilong Police Station nungi team kati Thoubal district kübok Lilong nung Kaleikhong Oil Pump anasa temulung melemibilemba tesem ka meita oa liasü.

Iba tesem meita aoba mapang nisung ana apu. Nisung ana ya Lilong Sirinthong nung alir Md. Achouba (19), aser Lilong Makha Leikai nung alir Md Abdul Razak (20) ta jangjaogo. Police-i tena ket nungi Royal Enfield Guerilla model motorcycle ka nguteta liasü.

Tanga meita aoba sentong ka nung Khongjom Police-i, Sora aser Khongjom na tsüngda ano nisung ka puogo.

Aija alisang ya Lilong Ushoipokpi Tharaorok nung alir Makakmayum Abdul Wahid (34) ta jangjaogo. Police-i pa ket nungi registration number MN04G 6586 keta aliba Royal Enfield Continental GT 650 ka aser LL key set ka ngutetogo.

Aija alir asemporngla ya tang police ket nung yua lir. Iba dak sendakba nung ken o maneni bushisüngdangdar.

Syria-i Suwayda nung ceasefire tasen sangdongogo

Damascus, Chiteni/July 19 (Agencies): Syria indang security forces tem linük south tsütsü Suwayda province-i yok tenzükogo, kong Druze aser Bedouin telungpur aser sorkar meyong sepaitem tsüngta raraba ajanga nisung noklang dak tema asü aser Israel mitkari teka aitba ajanga tensa tamajungba akum.

Israel aser Syria nati ceasefire alitsü mulungtepogo ta United States-i sangdonger ghonda ishika lir Honibarnü sepaitem ya yoker alitsü, ajisüaka yasüng maneni raraba ajanga tensa tia koma asütsüar memeteti lir.

Syria indang sorkari ceasefire ya Honibarnep sangdong aser ibai Syria nunger azü dokshiba nungi kumzüksü, Syrian territory telungjem wazüka ayutsü aser nüburtem kumzüka ayutsü mechi benok ta ashi.

Syria Tir Ahmed al-Sharaa-ia television ajanga sangdong ka agütsüba nung, Suwayda nung teka amuoka

linük indang security tanaben bener arutsü asoshi linük balala nungi call aru ta ashi.

Israel-i shilem agiba yong yimti nung tensa tamajungba akum, aser yangji raraba mazüoktetsüsa kumogo, ta pai ashi aser US dang teyari atema pelaba lemsatapa liasü.

Interior Ministry odongtar Nouredine al-Baba-i Telegram sangdong ka nung, civilian tem kumzüka ayutsü aser mepetmesü tatem kati arudaktsütsü nükjidong nung Suwayda province nung internal security forces tem yok tenzükog, ta shia liasü.

Tawa Druze kin aser Bedouin armed groups aser sorkar meyong sepaitem tsüngta raraba nung nisung aika asü.

Bodhbarnü Israel-i Damascus tiyong nung Syria indang Ministry of Defence dak tayimtsü amshia amak aser Suwayda region nunga Syrian sorkar indang sepitem dak maka parnoki Druze nunger kumzüka ayutsü

asoshi inyak ta ashi, shirnok dang "adianu" ta ajar.

Hokulbarnü Israel ketdangsür kati osangbener tem dang, southwest Syria nung tensa mejungi aliba mechi Israel-i taruba ghonda 48 tsüngta Suwayda district telungi Syrian internal security forces tatakzük aiddaktsütsü melaogo, ta shia liasü.

Syria indang Health Ministry ajanga ashiba agi, Druze nunger timba aliba yimti nung raraba nung asür nisung 260 jungogo. Nisung 80,000 shi iba tesem nungi jenogo, ta International Organization for Migration ajanga ashir.

Hokulbar aonung Israel army temi border guard unit den yaritepa Israel senso bena aliba Druze nunger kar Israel kübok aliba Golan Heights nung Majdal Shams area nung Syria den arütsü anasa border fence nungi meindok. Golah Heights ya Syria indang ama United Nations-i agizüka lir.

Trump-i WSJ anema sen \$10b jenjang ken o benok, kiburi ochi nung tamang akar



Washington, Chiteni/July 19 (Agencies): US Tir Donald Trump-i Wall Street Journal anema sen \$10 billion jenjang tenüng menüksüba ken o benokba nung kibur Dow Jones-i par osang abenba nung indang-indanga nokdaka lir aser court nung iba ken o raratsü ta ashi.

Trump ya 'convicted sex offender' Jeffrey Epstein den sendaktepa lir ta article ka züluba mechi ken o ya Hokulbarnü menur Miami nung aliba federal court nung benoka liasü.

"Kanga kumdanga aser tejangja nung indang-indanga osang abenba nung onoki tamang akar, aser kechi ken o benokdir tasü ita jembitsü," ta Dow Jones indang odongtar kati iba ken o benoker ghonda ishika lir ashi.

Iba ken o nung defendants ya Dow Jones; News Corp aser iba indang Chief Executive Robert Thomson; WSJ osangbener Khadeeja Safdar aser Joe Palazzolo; media mogul Rupert Murdoch; aser editorial staffers kar tenüng agüja lir.

Iba osangkaket ya Dow Jones ajanga ketdang asür, aser ibai News Corp indang division ka lir.

Kaket tapak 18 nung iba ashishitep ken o agütsüba nungya WSJ article yagi tiazü nung taoba real estate tycoon-i 2003 küm Epstein dangi 'suggestive birthday letter' ka yok ta shia lir - koba parnok tsüngta miim lemsatepba athishia aser 'sexually suggestive drawing' dena lir ta ashi.

Iba ya Ghislaine Maxwell ajanga bendenba birthday album bendenba nung agütsüba lir ta shir. Maxwell ya 2021 küm sex-trafficking aser danga ken o nung aibelenaliba nguteta Florida nung küm 20 tepuokdak yua lir.

"Iba drawing ya tetsür ka temang nung shilem balala yangluba lir aser iba tetsürla tepoklang nung 'Donald' ta meyongnem inokja lir," ta Journal ajanga iba drawing indang ashi. Iba shiti tembanga "Happy Birthday - and may every day be another wonderful secret," ta zülua lir.

Trump indang okatsür temi iba otsü ya khenyongi puraba lir ta ashir aser "Item tamakok ajuruba kuli ya shiti mesüra

drawing tejangja maliba yong lir," ta ashi.

Parnoki iba osang adokba ya osang abenba yimya nung aibelen bulu lir ta ashi aser iba otsü ya tiazü aser tenüng menüksüba lir ta ashi. Journal-i metetsümonga aser junga meshisadangi inyak aser iba article ajanga senotsü jenti akoksatsü aser tenüng menüksü ta ken o benokeri ashi.

Trump tir menden nung mener media company anema ken o benokba ibai mezüngbuba alitsü.

US Tir Trump-ia pa indang social media sapang Truth Social nunga, "Nüngdak makaba The Wall Street Journal nung tenüng menükja osang tiazü züluba nung shilem agia alir ajunga anema POWERHOUSE Lawsuit ka tang benokogo," ta Hokulbar aonung lemsatapa liasü.

"Rupert aser par 'medemertem' iba ken o nung ghonda aika nokdaker kuli agütsütsü imlar," ta paisa ashi.

Iba sülen iba article ya online nung kanga prokshitar, koba ajanga tenüng menüksü aser nisung million aikati reprangogo, ta Trump indang legal team-i ashir.

WSJ article ajanga 2003 shiti indang noksa mesüra direct reproduction kecha adokja mali aser yamaji maliba yagi iba ama shiti mezülü ta kuli tali sayur, ta Trump teloki ashir aser ibai election atongtsü lia yimtenren tsütsü pa tenüng menüksütsü merangba lir ta ashir.

Dow Jones aser The Wall Street Journal indang partent company News Corp mesüra osangbener shingiaia telangzüba kecha agüja mali.

Epstein ya 'disgraced financier' aser sex offender ka lir, aser pa 2019 küm New York jail ka nung soseta asü. Pa indang ken o nung conspiracy theories adoka Trump bhukumer matsüngdang nüngtugu akum aser sorkari Epstein takar aser tashi taiter tem den sendaktepa aliba miimbangtsü meranger südi ta amanga liasü.

Hokulbarnü Trump-i pa indang attorney general Pam Bondi dang Epstein anema ken o jembidang grand jury testimony lapoktsü merangang ta ozüing agütsür liasü.

DR Congo aser M23 telok tsüngta rara anentsü züingzüktepogo



Doha, Chiteni/July 19 (Agencies): Congo anüdoklen rara tembangtsü asoshi Democratic Republic of the Congo (DRC) aser M23 telungpur telok tsüngta Qatar nung 'declaration of principles' zülutepogo.

Iba sangdong ya Honibarnü telok anaprong nungi teshimtet nisungtem tsüngta Doha nung zülutepa liasü.

M23 ajanga January ita DRC indang yimti tulutiba ana amokbangba sülen DRC aser Rwanda-i yariba M23 telungpur tsüngta kanga sashia rara arua liasü.

Küm aika raraba ya 1994 Rwandan genocide nung tera yanga lir, aser M23 ya timba ethnic Tutsi fighters tem lir.

Taküm Congolese rara nung nisung meyirijang aika tepsetogo aser timba ang pei ki yutsür tesem balala nung jenshia lir aser regional war tesashi tenzüksü tensa nung lir.

DRC kidanger linük aikati sepaitem yoka lir.

African Union-i iba tezüngzüktep ya tongtipang terenlok ka lir ta ashi.

"DRC anüdoklen aser Great Lakes region nung teti yimjung, security aser tashi ita alitsü asoshi tanen makai meranga

inyakba nung ibai alizüing tongtipang ka asütsü," ta AU chairperson Mahmoud Ali Youssouf-i sangdong ka nung ashi.

March ita Qatar tetsüingtai ia DRC Tir Felix Tshisekedi aser Rwanda Tir Paul Kagame ajungbena ajurutepa senden amendang tekeraba nung condition makai ceasefire alitsü ayongzüka liasü.

Iba yongji DRC aser M23 tsüngta Doha nung indang-indanga jembishinü tenzüka liasü.

Taoba mapang DRC-i M23 den jembishinütsü memulungi liasü aser iba telok ya kiralongrar telok ka lir ta nüngja agütsü, saka April ita telok anaprongi ceasefire asoshi inyaktsü nangzüktepa liasü.

Ajisüaka iba tezüngzüktep nungya DR Congo anüdoklen nungi Rwanda aser M23 ainshitsüba indang shia mali.

Yimjung tezüngzüktep nung shilem ka ama linük litsü-lika ajunga nung sorkar tashi tanaben amshitsü DR Congo aser M23 nati mulungtepogo saka iba dak tali osang tejangja agüja mali.

Yimjung tezüngzüktep yanglutsü asoshi temonutiba agi August 8 nungi jembishinü tenzüksü, ta sangdong nung

shia lir.

June ita Washington nunga DRC aser Rwanda tsüngta senden mena liasü.

June 27 nü linük ana indang foreign minister ajanga yimjung tezüngzüktep ka nnung meyongnem agütsü aser White House nung United States Tir Donald Trump ajurua liasü. Trump-ia iba tezüngzüktep nung aibelenra senotsü aser danga lenmang nung temerenshi tesashi agütsütsü tekumandangtsü shia liasü.

Trump-i tezüngzüktep kar nung meyongnem agütsüteptsü asoshi Tshisekedi aser Kagame na Washington-i jaoka liasü, koba Trump indang senior adviser for Africa, Massad Boulso-i "Washington Accord" lir ta ashi.

DRC, United Nations aser anüolen linük temi Rwanda-i M23 yaria sepa aser nok-nü yoker ta ashir.

Ajisüaka Rwanda-i mapang talangka nungi M23 meyarir ta shia arur aser par sepaitem ya DRC indang army aser 1994 Rwandan genocide nung sendaktepa aliba Democratic Forces for the Liberation of Rwanda (FDLR) densema ethnic Hutu fighters nungi kumzüka alitsü inyakker ta ashir.

BADMINTON ASIA JUNIOR MIXED TEAM CHAMPIONSHIPS: India-i UAE koka quarterfinals tongogo



Chiteni/July 19, 2025 (Agencies): Indonesia nung tang asaya aliba Badminton Asia Junior Mixed Team Championships nung Honibarnü India team-i point 110-83 agi United Arab Emirates koka quarterfinals-i iogo.

Hokolbarnü mezüngbuba anogo Sri Lanka kanga junga akokba sülen tang UAE kokogo. Group D nung Hong Kong China-ia asaya ana kokogo aser team anaprongla knockout stage-i aitsü. India aser Hongkong na Group D takoker jangjatsü atema Deobarnü asayatsü.

Iba asayamung nung relay scoring format ka amshir, kong team kobai asaya ter nung point 110 ngudir iba team yagi asaya akoker. India team-i kanga junga asaya tenzük aser tetsür kija asayar Rujula Ramu-i 11-5 agi Mysha Khan akok aser iba sülen tarep

temeyoktep asayar C Lalramsanga aser Taarini Suri natia asaya koka 22-11 agi India team tejakdang aküm.

Asaya kar nungbo UAE team-i kanga meranga asayaogo, saka India team tetoktepba tepeyong tejakdang liasü. Asaya tom tashi nung point 55-41 ta India team tejakdang liasü.

Iba sülen US Open finalist Tanvi Sharma-i Madhumita Sundarapandian kanga junga koka point 66-46 aküm. Maneni Lalramsanga ano Reshika U den tanabuba tarep temeyoktep asaya aser tenati Adithya Kiran aser Mysha Khan na 11-5 agi koka 77-51 agi India team tejakdang aküm aser iba sülen asaya koka liasü.

India team-i iba asayamung nung 2011 küm tajungba asaya lir aser iba küm parnoki bronze medal ka angu. Taoba küm India team-i quarter-finals nung

Malaysia team 2-3 agi mekoki liasü.

Iba asayamung nung team 17 telok pezü kuma lemsar asayar. Telok asem nung team asemsem aser telok ka nung team pongu densema lir. Team ajak pei telok nung ata aliba team den khen khen asayatsü aser temaba jenjang nung tembangba team ana quarterfinals-i aitsü.

Taküm iba asayamung nung 110-point relay system benokogo. Team ana tsünga asaya ajak nung asaya 10 asayatsü; tebur kija asaya anana, tetsür kija asaya anana, tebur tarep asaya, tetsür tarep asaya aser tarep temeyoktep asaya. Team kobai point 110 tama tongdir parnoki asaya akoker. Tasembuba jenjang atema asaya mali aser semifinal nung tamakok anguba team anaprongla nem bronze medal agütsür.

HI-i tetsür hockey national camp atema asayar sangdongogo

Chiteni/July 19, 2025

(Agencies): Hockey India-i, taruba Asia Cup atema Indian Women's Hockey Team training camp asoshi asayar 40 shimba sangdongogo. Iba camp ya Sports Authority of India Centre, Bengaluru nung July 21 nungi August 29 tashi agütsü.

Asian Cup ya FIH Women's World Cup asoshi lenmang ka asütsü, koba Hangzhou, China nung 2026 küm asayatsü lir. Taoba camp nung shilem agiba asayatem ajak iba camp atema-a jaokogo.

FIH Pro League European leg nung junga masayatetba sülen India tetsür team ya FIH Nations Cup-i-relegate süogo, ajisüaka Asia cup nungbo junga asayatsü imla atadar.

"Asia Cup ya nungtugu continental asayamung ka dang masü saka 2026 World Cup nung indang indanga shilem agütsü asoshi lenmang ka lir," ta India tetsür team head coach Harendra Singh-i ashi.

"Onoki iba camp ya kanga süoki ia agir aser onok Hangzhou-i tekelok shisatsü aser shitemang ajak kanga junga renema aliba telok ka ama oner.

"Onoki taoba camp nungi asayatem shimogo aser iba ajanga lanur asayatem nem senior asaya nung yimyasüpatsü atema mapang tali agütsütsü," ta paisa shisem.

Asayar 40 agi kümtetba India tetsür hockey team senior core group:

Goalkeepers: Savita, Bichu Devi Kharibam, Bansari Solanki, Madhuri Kindo, Samiksha Saxena.

Defenders: Mahima Chaudhary, Nikki Pradhan, Sushila Chanu Pukhrabam, Udit, Ishika Chaudhary, Jyoti Chhatri, Jyoti, Akshata Abaso Dhekale, Anjna Dungdung, Suman Devi Thoudam.

Midfielders: Sujata Kujur, Vaishnavi Vitthal Phalke, Neha, Salima Tete, Manisha Chauhan, Ajmina Kujur, Sunelita Toppo, Lalremsiami, Sharmila Devi, Baljeet Kaur, Mahima Tete, Albela Rani Toppo, Pooja Yadav.

Forwards: Dipimonika Toppo, Hritika Singh, Deepika Soreng, Navneet Kaur, Sangita Kumari, Deepika, Rutaja Dadaso Pisal, Beauty Dungdung, Mumtaz Khan, Annu, Chandana Jagadish, Kajal Sadashiv Atpadkar.

Shami domestic cricket asayatsü imlar



Chiteni/July 19, 2025 (Agencies): England nung asayamung atema India Test team nung meshimba sülen India nung asayar tejen Mohammed Shami, domestic cricket nung asayatsü imlar. Pa taruba domestic season atema Bengal indang team shimtsü asoshi asayar 50 shimdang aliba nung densema lir.

ESPNCricinfo sangdong ka ajanga ashiba agi, Shami ya Duleep Trophy nunga East Zone nungi asayatsü akok.

Duleep Trophy ya August 28 nü tenzüksü aser asayamung ya taoba mapang ama inter-zonal format nung asayatsü aser team nung shimra Shami maneni competitive cricket nung asaya tenzüksü.

Bengal team atema shimdang alirtem rongnung Abhimanyu Easwaran, Akash Deep, Mukesh Kumar, Shahbaz Ahmed aser Abishek Porel nung densema lir.

BCCI indang medical team-i Indian board dang arishi küm 34 tain asayar yagi bowling over aikabo montettsü ta ashiba sülen Shami ya Anderson-Tendulkar Trophy atema asayar 18 shimba nungi züngtoka liasü.

Shami ya 2024 küm tetsüng teloktep surgery agi aser iba ajanga pa küm ka shi masayateti liasü. Pa taküm T20 nung asaya-a asayashi tenzükogo aser Champions Trophy nunga shilem agiogo.

Arsenal-i pound million 48.5 agi Madueke alizükogo

Chiteni/July 19, 2025 (Agencies): Arsenal-i Chelsea nungi England nung winger Noni Madueke pound million 48.5 agi alizükogo.

Arishi küm 23 tain asayar ya United States nung Club World Cup akokba Chelsea indang squad nung liasü saka taoba Deobarnü final nung Paris St-Germain goal 3-0 agi makok tsünga pa Mikel Arteta-i aniba team nung oa adentsü atema ken o tembanga jembishinütsü asoshi camp tokja liasü.

Madueke-i Arsenal den küm pongu atema tenangzüktepba ka yangluogo aser pa indang taah ya add-ons bendenlokerbo pound million 50 dak tema akümtsü.

"Idaki aruba atema kanga ajemalua bilemer aser temaotsü ka ta züngshir. Iba inyakyim takok angütsü atema shirnokisa teyari agütsüogo, nenok ajak dang pelar," ta pai Instagram nung zülutsü. "Ni ground nung kü dak tamang



akaba sayuba meyipa agütsütsü yongyaseta atar," ta paisa shisem.

2023 küm PSV Eindhoven nungi pound million 30 yong Chelsea nung oa adenba sülen pa iba club nungi 92 ben asayaogo aser iba mapang goal 20 idaktsüogo aser taoba season Chelsea puri Conference League akokba mapanga teyari tulu agüja liasü.

Pa ya Netherlands nung oa küm pezü ser tesadang masaya tsünga Crystal Palace aser Tottenham academy nungi asaya liasü.

Madueke England senior team nungi mezüngbuba 2024 küm August ita asaya liasü aser Thomas Tuchel-i aniba England team-i taoba ita World Cup qualification nung Andorra goal 1-0 agi akokba asaya nung pai Harry Kane nem ball ka yangluja goal idakja liasü.

Brentford nungi midfielder Christian Norgaard aser Real Sociedad nungi Martin Zubimendi na aser Chelsea nungi goalkeeper Kepa Arrizabalaga nung alizükba sülen Madueke ya Arsenal puri tang transfer window nung alizükba asayar pezübuba kümogo.

BILEMDANGANG

"Nü mulungi na maitsütsüsa alitsü merangang."